

Sagai Muittalægje

1as August 1908.

No. 15.

»Sagai Muittalægje« boatta guovte gærde juokke manost, 1as ja 15ad bæive, ja maksa ovta kruvna ja 20 øra jakkodagast — 60 øra jakkebælest. Bladde matta dinggujuvvut juokke poastarappe bokte. Diedetusak maksek 5 øra rana.

5ad jakkodak.

Hærra redaktør!

»Nuorttanaste« 12ad nummarest oidnu okta olmai Dønost maidnomen »venstre.« Barggi-bæle son fast moaita. Mu mielast læ juokkehaš buorre, gi mange lakai viggas varnotesvuoda gæpedet dam mailmest, lekus venstre, høire daihe sosialista. Gi æmbo nođid viggas bigjat vuoleb gærde bagjeli, su mi galggap vuostalastet.

I dat læk nuft, atte sosialistak gæppanek Tuiskalandast ja Ængalandast; si læk dobbege lassanam; dušše dam manemus stuuradiggevalljejumest si æi læk ožžom aido nuft ollo airrasid stuuradiggai go ouddal, mutto sosialista-vallijægjek legje sagga æmbo go ouddal. Suomast maidai lassanek sagga. Suoma stuuradiggest legje nuft ollo sosialistak, atte Ruoša kæisar bijai obba stuuradigge ruoktot ja asati ođđa vallijume. Dal læ dat »valgga« aido gærggam, ja dal botte vela æmbo sosialistak Suoma stuuradiggai go ouddal — obba 83. De dam de vuiti Ruoša kæisar!

Sosialistak æi sate gæppanet; sin oappo læ vuodduvvum Jesus oapo ala, vaibmoladesvuoda ala. Ædnagak sist æi læk ælle kristalažak, sæmina lakai go venstrestge ja høirest æi læk ælle kristalažak. Mutto vela daggar sosialistakge barggek Ibmel goččom mielde, go si hæjobgærde viggak væketet. Si læk buorebuk go daggarak, gæk njalmin rabmujek ječasek kristalažžan ja almaken čužžok hæjoi vuostai. Muittop mi Jesus værdadusa: Ačče goččoi barnes guokta barggat; nubbe loppedi barggat, ige daddeke barggam; nubbe bietadi, ja almaken bargai. Goabba læi buoreb? — Æd-

nag sosialistak læk maidai ælle kristalažakge.

Mi barggi airrasak væketæimek dam dalve venstre airrasid; min væke bokte si sate njæiddet Løvlanda radđetusa. Mi læp jurdašam naft: venstre læ aggam, atte æi si sate maidege oudedet nuftgukka go sist i læk radđetus. Mi didimek burist, atte venstre læ dušše; mutto amas boatte stuuradiggevallijume aige bæssat aggadet, atte danne si æi læk bæssam oudedet maidege burid, go sist i læmas radđeradđetusast fabmo, damditi væketæimek mi venstre fabmoi.

Ja dal læ venstre famostes. Mutto maid læ sin radđetus oudedam? I maidege. Daihe njuolgabut dagjat: dušše boastovuodaid. Venstre radđetusa oaiive, Gunnar Knudsen, gutte ouddal læ bilkoin cækkam, atte Sameadnam læ moskočiekka, son læ dal gieskad ængalas soateskipast cærke jugadedin cækkam, atte jos Norgi mikkege vaddoid šaddaš, de Norga luotta Ængalanda ala. Dam dajai son, vaiko æra rikai diplomatak birra čužžu. Dego Norga lifči Ængalandi ječas gidda vurdnum! Stuuradigge fertti albmoset cækket, atte go son læ statsministeren šaddam, de galgga nubbe have diettet varai hallat.

Venstre læi loppedam spidnebuoide duollo gæppedet. Dal stuuradiggest Gunnar Knudsen caggai dam nuft ænemusat go sati; astek han barggek, gæk spidnebuoide adnek, astek si duollo makset.

Venstre soatte-minister Lowzow læ muttom girjai čallam oudda-sane, mast son bajeda Karlstad-šiettadusa, ja daggobokte moaratutta Ruotarika min vuostai. Stuuradigge fertti daggoge šiettat, atte Norga adna arvost Karlstad-šiettadusa. Rafhe mi ferttep

gæččælet bisotet.

Dal datto venstre radđetus sagga, atte oapatæggi-skuvlak ja underoffiserskuvlak galggek dakkujuvvut oktan skuvlan; seršantak galggek šaddat oapatægjen; dalveg skuvllet ja gæssege ekseserit. Juokke olbmast galgga soaldat-balvvalus aigge gukkeduvvut manga, manga jage; dušše soaldatbiktasidi galggek golok lassanet 5 miljon kruvno! Njælljad august šadda garra naggo dam alde. Im mon jake, atte stuuradiggest gavdnujek nuft ollo daiddemættom olbmuk, atte daggar mielates oaiivel vuotta.

Ikte valddujuvvui erit rievannverro Sameadnamest dalveg. Mon gæččalim dam vuostai doarrot, mutto im nagadam caggat, go Sameadnam ordføarak guokte jage juo læk gaibbedam, atte i galga læt mange lagan borre-spirest værro Sameadnamest. Manne i, go muttom gæfhes Sabme-las soames navde ain goddi!

Skuolffai bigjui værro sæmma go æra gazzaloddidi. Garranassi ja vuorččaidi fast 20 evri.

Godde i læk šat loppe bæččæt uceb luodain go daggarin, mi læ 12 millimeter ravdast ravddi. Dat læ buorre; dastgo dam ragjai læk Krag-Jørgensen bissoin gavpug gandak dušše bitedam goddid. Dibma goddujuvvui godde, mast legje 23 Krag-Jørgensen bissoluoda rungo siste, ige læm almaken jabmam.

Dal i læk šat manain baggo boatet bispa daihe provsta ouddi girkkoguoibbai, jos æi dato.

Buok gielastivrak galgasegje dal Sameadnamest šiettat, atte rievsbivddo i galga algget nuft ærrad go dam ragjai. Radđetus læ loppedam dasa mieltat.

Lænsman Amble, Lappet, oazžo

dal daid ruđaid, maid son oudal i læm ožžom matkides oudast.

Okta erinoamaš buorre laka olgusaddujuvvui dal stuoradiggest Juokke fiskar galgga dal assuransi bigjat ječas. Mi diettep buokak, man stuora buristsivdnadus dast læmaš, go fiskarak læk bæssam uccanaš makset medisinkassi, ja daggobokte læk ožžom frigja dalkkasid ja doaktar, jos buocovuotta dæivva. Dal šadda dat oaivvel ain videduvvut: Jos oktage fiskar hævvan daihe bivdo gæčeld massa dærvastuvuođas, de oazžo su læska daihe manak daihe vanhemak daihe ærak, gæi oudast son læ morraš adnam — 800 kruvna. Oazžo njuorjo-bivdo gæčeldge vahaguvvat, de almaken maksujuvvujek dak 800 kruvna. Juokke fiskar galgga dam oudast makset kr. 1,50 — kruvna ja vittaloge evre — jakkasažat. Dat læ halvbe; dam maksa juokkehaš buorre mielast. Norgast hævvanek jakkasažat 208 fiskar. Danditi læ buorre, go sin dille, guđek oarbesen bacek, uccanašge buoreduvvu. Gi dam bælnub' kruvnoi vela laset kr. 1,40, de oazžo, jos likkotesvuotta dæivva, kr. 1200,00; ja gi laset kr. 2,80, de oazžo kr. 1600,00.

Gæččaluvvui datge ožžujuvvut, atte nissonak, gæk mæra sukkek, maidai galggek bæssat ječasek assurerit. Mutto dat i ožžujuvvum, ja dat læi boastot; dastgo læk nissonak, gæina læ boadnja buocce, ferttijek ječa mæra sukkat. Jos daggar nisson hævvan, de bacca su buocce boadnja fidijægjetaga.

Lænsman Bø, Kjelvikast, læ dal ferttim ruoktot makset Jakob Anderseni kr. 44,00, maid son læi boastot aldseisis bodnjam. Hammerfest sorenkskrivar læi dagjam, atte Bø læi riekt barggam. Departementa ja amtman goččoiga ruoktot makset. De bođi maidai jæraldak sorenkskrivarige, atte manne son nuft boastot halla. Dasa son i diettam æra vastedet go dam: Nuft moft Bø læ barggam, nuft læ vierro Samecednamest. Dat læ sæmma go lifči dagjam: boastot dat gal læ barggam, mutto barggek dat ærakge boastot! Lænsman Bø læi aukšion-goloid valddam, vaiko Jak. Andersen mavsi væros, oudalgo aukšion dollujuvvui.

Dal oidnu avisain, atte Hammerfest politimceistar læ sakotuvvum 40 kruvni, sorenkskrivar 40 kruvni, sunddečalle 20 kr. fuollamættomvuoda diti doaimatusa siste.

Skuvla-laka læ maidai læmaš divudume vuolde. Dat arvvalus, atte juokke manast galgga baggo vazzet 15 vakko skuvla jakkasažat, dat goarkaluvvui nubbe jakkai. — § 61 galgai girkkokomite arvvalusa mielde oazžot dam lasatusa, atte jos oktage læ nuft gæfhe, atte girjid i væje oastet manaidasas, de galgga vaivaškassa väketet, mutto dat väkke i galga lokkut vaivašvækken. Mon dajam stuoradiggest, atte ollo manak darbašek väke skuvla diti sikke biktasidi ja borramušši, æige dušše girjidi. Damditi lekus vaiko mi vekid, maid olmuš skuvla diti darbaš, dam väke diti i galga oktage masset stemmeret. Girkkokomite mieđai mu arvvalussi, ja obba stuoradigge ovtamielalažat.

Telefonbudšet vuolde mon gæččalim dattot telefonstasjonaid Annejokki ja Sieiddai, ja ođđa linjaid Gilevuonast Daiggevudni, Oarddavuonast Mækeri ja Davvesidast Čacesullui.

Sameadnam duodar-stovoidi læ stuoradigge dagjag addam ruđaid čuovvovaš lakai:

Jokkajavre stoppoi: ođđa gatto ja æra divudumek suoidnelatoī kr. 100,00.

Gargia stoppoi: ođđa laibbomoabman, ja ođđa stallja assai, gutte dam ragjai læ heppušes ferttim adnet navetest . . . » 180,00.

Lavinjavre stovost gatto ja fæsker divuduvvut . . . » 150,00.
Myrsletten stoppoi ođđa navet » 96,00.

Solelvnæs stoppoi ođđa vuoššamoabman . . . » 100,00.

Ravnastoppoi: oudeb assest lađo lodnot, assamvistai siskušak, ja ođđa aššodamviste (privet) . . . » 225,00.

Igjajavrrai ođđa stoppo » 900,00.

Lævvajoga stovost gatto ja aide divuduvvut, ja siskušidi » 220,00.

Skoganvare stoppoi: divudumidi kr. 100,00, ja aiddai giedde birra, vai matkalažai heppušidi šadda guottom, kr. 400,00 — oktibuok . . . » 500,00,

Amtman Urbye læi mannanu čavča Ruošæadnamest, ja su sagjasaš i læm oudedam maidege aide harrai Skoganvarrai. Damditi læi dat ašše boattam njuolgga veikomiteai; departementa maidai i læm dagjam maidege. Veikomiteast arvvaluvvui, atte go departementa i læm dagjam maidege dam aššai, de æi si riema dalle addet aiddai maidege. Ferttijim mon fidnat departementa sagain, ja go departementa mieđai, de mieđai maidai vei-

komitege, mutto dam bagjeli fal, atte dam aide divudæbme i galga gullat stati. De mon im diettam æra go stuoradiggest jærrat, atte gi dalle galgga divudet, go stata i galga. Goakkegiedde gieldest læk nokka maksamušak damtaga, ja Garašjoga gieldda, mi dast avke adna, varra maidai i barga dam; dastgo Skoganvarre læ Garašjoga olgobælde. Stata fertte divudet. I dam mu oaivvel oktage vuostalastam stuoradiggest, ja »gi javotaga orro, dat mietta.«

* * *

Maņemuš nummarest læ »Nuortanaste« goavve mu vuostai, dannego mon im liko dasa, atte min girkkoi særvek čuožželek, mak guimidæsek vašotek. Vašest i boade goassege buorre Go Michelsen radđetus namati Johannes Ording professoren, de Odland moarest celki ječas erit. Igo min universitetast lifči sagje mangalagaš professoraidi? Vai dattogo »Nuortanaste«, atte buokak galggek læt ovta fuorma mielde leikkijuvvum? Dat læ aibas Luther oapo vuostai. Luther i duttam goassege dasa, maid ærak celkke, jos son oamedovdostes i dovddam, atte riekt dat læ. Æp mi galga Luther rakadet paven nuft atte, maid son dajai, dat i galga agalažatge nubbastuvvut. Luther gildi, atte i oktage galga Ibmel sane sardnedet ærago pappa; damditi Dača papak givsedegje Hans Nilsen Hauge giddagasaiguim, dassago massi dærvastuvuođas. Dat læ dal nubbastuvvum, ja varra i »Nuortanaste« redaktorage dato, atte dat Luther oappo ain galgaš læt famostes. Manga artikal læk aige mielde nubbastuvvam buok oskolaš čallagin, dastgo alma dak olbmuk, gæk maņel bottek, gæk čokkajek oudeb olbmui aigi alde, oidnek gukkebuidi go doluš olbmuk. Pave bibal goččo »Vulgata;« dat læ dovre juo jorggaluvvum, ja dalle goas olbmuk æi mattam gielaid nuft burist go dal, de šaddai jorggalus manga saje boastot. Mutto almaken gieldda pave, atte i oktage sadne galga divvujuvvut. Nuft orro Odlandge ja bispa Hauch dattomen: i mikkege galga divvut, vaiko man boastot læš.

Go min girkkko algga siskaldas naggoid doallat, ja go dat rido dal boatta maidai albmug-olbmui gaski, de illod diettalas »Nuortanaste.« Dastgo »Nuortanaste« læmaš ale min girkkko vuosta. Dat læ alo viggam suole gilvvet dam fuones gilvvag Sami gaski, atte si galgašegje ječasek erit girkkost celkket. Maggar duomo son bispa Hauch lifči celkkam »Nuortanaste bargo harrai? Varra sæmma lagan go Sami bispa Bockman nuft davja læ celkkam.

Isak Saba.

Lagamannedigge.

15ad juli boði lagamannedigge
eoakkai Vargain. 6 aše legje boattam
dam duobmostuolo ouddi.

Vuostas ašše læi olmuš-soarddem
ašše Gjæsverast. Matis Matisen Gjæs-
verast læi dast dalvveg Gjæsverast
čuggim doppa-nibin gavppeviesost
muttom olbma, gæn namma læi Mi-
kal. Son læi bagjelmæralažat suttam
dam olbmai, dannego dat olmai læi
fillim su aka ja duššadam su naitus-
vuoda oasalašvuoda. Matis læi bivd-
dam eisevalddi vake bæssat ærranet
akkastes erit, mutto dam bivddemest
i orrom su mielast vuolggemen mik-
kege. Son guđi dalos, vuolgati boar-
rasemus nieidas æra olbmui lusa
Tromsi ja valdi barnes mielde. Vai-
vaš bærraigæčče gildi Matis vuovd-
det jafoid, mak sust legje bagjel ječas a-
no, dannego son gaddi, atte Matis læi
gædnegas biebmat akas. Gavppeolmai
Gjæsverast, gæn bælljai dat læi bo-
attam, biettali oastet jaffoid, maid son
læi loppedam. Matis šaddai aibas
vuorradussi. Galgaigo son biebmat su
oskaldesmættom akas, daid vierro ma-
naid, gæidi son i læm ačče ja vela su
akas rakistægje.

Daggar jurddagak dakke su dor-
votæbmen, ja su moarre golgai bag-
jel ravdaid. Gjæsverast gavnai son
akas fillijægje ja čuggi su, nuft atte
moadde bæive maŋŋel jami Hammer-
festa buoccevesost.

Dam ašest legje 10 duodaštægje.
Buokak muittalegje, atte Matis čađa
aige læ læmaš rafhalaš olmai.

Lavddeolbmak gavdne Matis læt
aššalažžan olmuš soarddemi, mutto
si gavdne maidai, atte dat læi ollo a-
ka ja Mikal-rokke sivva. Dasto celk-
ke duobmarak duomo: Son dubmi-
juvvui golma jakkai giddagassi. Dam
aigest eritgessujek dak 72 bæive, maid
son læ čokkam giddagasast, dassačigo
ašše ouddan boði.

Nubbe ašše læi boaco-suoladam
ašše. Muttom olmai, Nielas Bierra,
Mærra-Sabmelaš, Stuuravuonast Lages-
vuonast, læi guoddaluvvum suoladam
boccuid. Su duokken gavdnujuvvui 5
duolje, maina læi baččum-raigge. Son
ješ logai oastam 3 duolje, ja 2 gulle
Elli, gæn dalost son oroi. Dam ašest
legje 22 duodaštægje, arvad Garašjo-
ga Samek. Lavdde-olbmak gavdne su
aššalažžan, ja duobmarak dubmijegje

su dasto 8 mannoi giddagassi. Son i
galga læt valddam duomo vuostai,
mutto appelerim.

Goalmad ašše læi muttom agenta
Solberg vuostai. Son læi Hammerfest-
ast vuovddam ovta ganddi ovta suorb-
masa, maid son dalle logai læm gol-
lesuorbmasen. I dat læm æra go mes-
segsuormas, maid oaste oažoi diettet,
go manai golle-čæpe lusa Hammer-
festast. Suorbmas alde læi 14 k, maid
son čajeti oastai, ja dat jaki dalle, at-
te dat læi gollesuormas. Son mavsi
5 kruvna dam oudast.

Dam ašest legje 3 duodaštægje.
Lavddeolbmak gavdne agenta aššalaž-
žan betolašvutti. Son læi manga gær-
de ouddal juo læmaš rangaštusast.
Duobmarak dubmijegje su 1 jakkai
giddagassi.

Njæljad ašše læi muttom Suob-
melaža vuostai, gi oroi Vargain. Son
læi guoddaluvvum dast dalvveg, mak-
ka læi galggam muttom fiskar oudast
cuvkkitet 10 kruvna, mutto go son
manai olgus, de son i boattam šat
ruoktot. Fiskar gavnai politia ja muitt-
tali dasa, atte Suobmelaš, Karjalainen
læi sust ožžom 10 kruvna, maid gal-
gai cuvkkitet. Go Karjalainen gavdnu-
i, de læi son nu garremin, atte i daib-
bam maidege. Su bagjelist gavdnu-
i kr. 6,70. Dam ašest legje 3 duodašt-
ægje. Daina duodaštusain gullui, at-
te Karjalainen dalle juo læi garremin,
go vulgi olgus 10 kruvna cuvkkitet.
Maŋŋelgo son oažoi bargo, saddi son
kr. 3,30 politiai, makset dam mi vai-
loi 10 kruvnast.

Vissasi læi lavddeolbmai gaskast
æppadus, galggego dam olbma dov-
dat aššalažžan, dainago son læi læmaš
nu mendo garremin, atte son i daig-
dam ješge diettam, maid dagai. Dad-
deke gavdne lavddeolbmak su aššalaž-
žan adnam miellaævtolažat dam 10
kruvnast, mi sudnji læi oskelduvvum.
3 lavddeolbma æi dovddam su ašša-
lažžan.

Karjalainen læ jukke, ja læmaš
manga gærde ouddal juo rangaštusast.
Duobmarak dubmijegje su 90 bæiv-
vai giddagassi.

Viđad ašše læi muttom nuorra
Suobmelaža Johan Koivoniemi Ber-
gain vuostai. Son læi guollebivdde.
Dast gidđa-gæse boði okta Ruošša Bo-
lakoff, gi læi erit Arkhangel lakkasin,
Vargai gavpugi oastet njæljad-vadnasa
aldsisis. Son boði sakalagai Johaniu,

ja dat muittali, atte Johan vieljast læi
okta dækkavanas, maid son vuovdda-
laddai. Ruošša čuovoi Johan mielde,
ja boði kaja ala. Go Johan viellja i
læm dast, de i šaddam mikkege gav-
pid, ja ige Ruošša likomge dækkavad-
nasi.

De ožžu Johan gazze ja Ruošša
vuollaga, maid si jukke nuft, atte šad-
de garremidi.

Ruošša læ čilggim, atte Johan
cabmi su olgobælde gavpuga dam ija
fastet ja rievedi sust buok ruđaid ok-
tibuok 125 rubel, mak gavdnujegje su
duokken. Iđđedest boði Ruošša vuo-
las gavpugi, ravas oivid, ravas julgid,
ja sust legje manga raige oaivest. Son
læi ješlagan oaidnet, varran sikke
muotto, oaivve ja biktasak. Son læi
varddam fastet. Dieva alde gavdnu-
i olles varraladdo. Dam ašest legje 4
duodaštægje. I oktage sist læm oaid-
nam, atte Johan Koivoniemi cabmi
Ruoša, nuft atte son vardi ja rievedi
ruđaid. Dušše 2 duodaštægje læiga
oaidnam, atte Johan manai Ruošain
bajas; nubbe læi damge oaidnam, atte
Johan čorbmadi Ruoša guovte have.

Lavddeolbmak gavdne Ruoša a-
šetæbmen, ja duobmarak dubmijegje
Johan Koivoniemi 6 jakkai giddagassi.

Johan Koivoniemi læ dušše 23
jage boares. Daddeke læ son læmaš
juo 8 gærde rangaštusast. Son galg-
ga læt okta varalaš olmai, go læ juk-
kam.

Guđad ašše læi muttom estlæn-
der (Ruoša) vuostai. Su namma læi
Johan Doro. Muttom Micamar-ækked
legje muttom estlænderak ja fiskarak
dorum Vargai gata alde. Si balko
guđeg guimidi gedgid. Muttom fiskar,
Andreas Nilsen Vargast erit, dæivata-
lai ovta gædgest, mi boði su oaivvai.
Son gaččai, ja jami jandur gæčest.
Johan Doro makka galgai balkkestam
dam gædge; mutto muttomak duodašt-
ægje, atte dat læi okta æra. Dam
ašest legje 10 duodaštægje.

Lavdde-olbmak æi gavdnam Jo-
han Doro aššalažžan dam bahadak-
koi, ja duobmarak dubmijegje su
dasto ašetæbmen.

Viggai akas sorbmit.

Muttom olmai Ole Foss Jarlsberga
gavpugest viggai gieskad akas sorb-
mit. Akka vikkogodi ja vuovsadi
mirko jukkamuša. Dasto bači Foss
ječas. Maŋŋeb aiggai læi læmaš dav-
ja rido sodno gaskast. Sodnost læ 4
mana.

Juli mano

loapast læ læmaš siega dalkek.

Turkarikast

læ dal æratuvvam radđem lake. Dam ragjai læ sultana (rika oaivvamuš) radđim okto ješ. Dal galggek dobbege valljijuvvut stuoradigge-olbmak. Olbmuk dobbe læ dam diti sagga avost.

Suomaædnam stuoradigge

boatta čoakkai las august.

Olo værredakkek.

Dr. Paul Vinge muittal »Kringssjaa« est, atte 5 prosent Kristiania orroin læ værredakkek. Dobbe læ uccemusat 4000 olbma ja 2000 nisson, guđek æi ælet ječasek gudnalaš lakai. Lakka 2000 nissona æletek ječasek nuoskesvuoda ællemin.

Kina kaisar

buocca raddedavdast.

Navuonast

læ Ruosorreg bajabælde gavdnum valjit væikke. Væikke-sargastak galgga læt almosest juo manga metar gukku ja muttom sajin bagjel metar govdo. Inšenør Johnsson, gutte gieskad læ læmaš dobbe gæčadæmen, gadda, atte dobbe væike særvest vissa læ maidai vahaš golle ja silbba.

Mada-Varjak sagak.

(Brævva »S. M.« i Girkkonjargast).

Basvignjargast Mada-Varjagast læ dat sagje, mi goččujuvvu Girkkonjargan. Varjakvuodna manna avest sisa lullas guvllui, ja Girkkonjargga læ gosi lika lullen go Tromsa gavpug. Girkkonjargga læ čabba baikke. Sukkis soakkevuovdde algga juo mæra rajest, ja čabbodatta dam baike.

Dast gieskad oappaladdim mon muttom čabba gæssebæive Girkkonjarga. Dat læge dat sagje, gosa farga šadda olles gavpug. Nuftgo lokkek dittek, de læ dobbe bagjebun gavdnum dat stuora ruovddevarre, ja muttom miljonsærvve »A/s. Sydvaranger« læ alggam bargatet dobbe.

Moadde jage dast ouddal læi Girkkonjargga okta jaskis baikke. Æi dobbe læm dalle galle asse. Dušše pappa, doaktar, lukkar, gavppeolmai ja moadde æra orru dast. Dal læ dat æra lakai. Girkkonjarggi læ rakaduvvum ædnag stuora orromviesok, gost

barggek orruk, ja jos man lagan duogjarak ja gavpalažak læk sirddam dokko. Bavkas ja rattam gullu čađa bæive. Olbmak barggek, hčestak gessek, mašinak jorrek. Okta nubbe vieso æeggan, okta nubbe bakte luoddan ja cuvkkijuvvu moallon. Buok æratuvva. Okta olmai, gutte moanai dagid dast ouddal læi oappaladdam Girkkonjarga, jorai dal gukka, oudalgo gavnai lukkar stovo dai ædnag ođđasist rakaduvvum viesoi gaskast.

Bagjen, 17 km. arvo Girkkonjargast bajas, læ dak ruovddevarek, gost ruovdde-gæđgek havtin erit baččujuvvujek. Dokko læ særvve rakadattam ollo vistid. Dokko manna balges, ja dal læ dokko barggamen ruovdde-mađe.

Nuftgo dam blađe lokkek vissaset muittok, de læi dast gidđa-gæse »stræikka« dobbe. Dal læ fast soppujuvvum ja barggo fast alggam.

Dal læk dobbe lakka 500 barggek. Barggosærvve læ rakadam gavpe. Dobbe Girkkonjargast læ maidai stuora vieso, gost barggek ožžuk oastet gaskabæive-mallas, go dattuk.

Barggi-vistek læk stuora buorek dimbar-viesok, gosa čacce-boccek mannek. Æi darbaš barggek viežžat čacce jogast daihe galdost.

Girkkonjargast læk barggek asatam ovta særve, man namma læ »Nordens klippe.« Okta daina, gi læ dam særve angeremus latto, læ doaktar æmed Ellisif Wessel. Barggisærvest læ stuora čoaggalmasviesso vuovde siste. Dam vieso baldast læ doaktar æmed gæsse-orrom-viste. Sosialistai varra-ruksis lævgega libaida staggo gæčest dam guokta vieso gaskast. Doaktar æmed lutte legje dalle, go oappaladdem Girkkonjarga, golbma olggöædnam studenta, okta ungarnalaš, okta ruošsa ja okta pollakkalaš. Muittaluvvu, atte dak legje boattam deike studerit dam sosialistalaš bargo dabe Norgast. Æreb daid læi girječalle Johan Falkberget maidai Girkkonjargast. Son oroi maidai doaktar æmed dalost.

Dat læi dieđetuvvum, atte Johan Falkberget dam sodnabæive, go mon legjim dobbe, galgai doallat saga barggi čoaggalmasviesost.

Mon vulggim dokko gulddalet dam olbma, gæn girjid mon muttom læm lokkam.

Dimo 4 bođi Johan Falkberget,

okta 29 jakkasaš olmai, gi ješ læ læmaš gruvvabargge. Mendo uecan legje olbmuk boattam čoakkai. Son sarnoi dam birra, atte dat læ avkalaš, atte barggek servvek okti ja rakadek servid, man lakai si nagadek vuostalastet, go kapitalistak viggek sin varaid njammat.

Doaktar æmed læ okta nisson, gæst læk stuora addaldagak. Son læ oappavaš ja gielalaš. Manga bargge gullujegje maidnomen su; mutto muttomak adne, atte son læi bærahaga hoppui ja naggar su oaivvelidesguim. Kapitalistak æi guodde sudnji oalle buorre vaimo. Oanekažat celkkum: Doaktar æmed Ellisif Wessel Girkkonjargast læ dat olmuš, gutte dobbe ænemusat rakistuvvu ja ænemusat vašotuvvu.

Y.

80 miljon kruvna.

Dast gieskad vihatuvvui Londonest dat franskalaš prinssa Maurice Sogan mutttom Amerika nissonin, gæst læ 80 miljon kruvna obnudak.

Stuoradiggeolbmai valljim**Suomaædnamest.**

Nuftgo min lokkek muittok, de sirri Ruoša radđetus dast dalvveg Suomaædnam stuoradigge. Dal læ dobbe læmaš ođđasist valljim. Suomaædnam stuoradiggest čokkajek dal 200 »olbmak«, maina læk 76 sosialista.

Boakko-davdda

gullu dal Arkhangelest, Ruošarikast.

50000 skuvllamana

galggek læt Newyorka gavpugest Amerikast, guđek læk nu gæfhek, atte si botte borakætta skuvlai.

Guokta nuorra barne

bođiga erit Girkkonjargast dast 19ad juni. Soai læiga ovta javrest ouddam sukkamen moadde oktičaskum fielloalde. Alma læ fiellok hallanam ja barne-guovtos čalggam javrrai.

Same-nidi

læ buorre bigomsagje ovta Dača gavppeolbma lutte. Buorre balkka ovta dokkalaš ja bargolaš nidi. Čabba ja havskes baikke, dasa vela handalsagje.

Handelsm. **Th. Holm,**
Gaashopen.

Redaktøra: **A. Larsen.**

Prenteduvvum „Nuorttanaste“ prentemrakkanusast, Sigerfjorast.